

avaloracion diagnostica educacion primària

competència comunicativa: aranés

tèxte de comprenença orau

instruccions entath docent

Un viatge repartit eth quadèrn, eth docent aurà de liéger es qüestions de comprenença orau entà per'mor qu'es escolans les coneishen abans d'escotar eth tèxte.

Eth docent a de liéger eth tèxte dus viatges, es escolans **non** lo veirà escrit. Era prumèra lectura ei entà que responen as qüestions e era segona entà que revisen es responses.

Era lectura a d'èster lenta e expressiva, en tot marcar es pauses. Era prononciacion a d'èster clara e eth ton de votz adequat entà afavorir ua bona comprenença.





Deu èster polida, era tranquillitat!

Se i auie bèth escolan distrèt ena classa de tresau, aqueth qu'ère Pau. Quan era mèstra explicaue, Pau viuie en sòn mon: non escotaue ad arrés, non parlaue, badaue, e semblaue que non i siguesse.

—Qué hès, Pau? Compdes mosques?

Qui non lo coneishie s'estonaue, mès aqueri qu'auien anat tà casa sua, lo comprenien.

Viuie damb es sòns pairs, es sòns pairs-sénhers, era sua germana petita, eth can, eth gat e eth papagai. Era sua mair-sénher ère pianista. Ath pair-sénher li agradaue recitar vèrsi damb era sua vutz potent mentre hège a anar es braci entà dar-se mès importància. Sa mama auie eretat era afeccion dera mair-sénher entara musica, e ère cantaira. Cantaira d'opèra, d'aqueres que d'un crit pòden hèr a petar ua copa de cristalh.

Eth papagai ère ben simpatic. Saludaue as visites e les didie peth sòn nòm o se les inventaue:

—Bon dia, Manèl...

—Bon dia, Mercè...

Cada tarde, ath papagai li agradaue volar pera casa. Alavetz, eth gat l'acaçauè hèn sautets entà atrapar-lo, e darrèr deth gat i anaue eth can, lairant. I auie un combat de pòur...! Sustot se coïncidie quan era mair-sénher tocaue eth piano, eth pair-sénher ensajaue es sòns vèrsi e sa mair premanie bèth concèrt.

Per aquerò, soent, Pau non escotaue mès, se metie en un cornèr dera sua abitacion e aqui s'estaue pensant ena lua... o compdaue mosques.

—Deu èster polida, era tranquillitat! —pensaue.

Alavetz ère quan era sua germana petita començaue a plorar...